

Accompagnar segir sur via vi

La polizia chantunala ha explitgà sia instrucziun da traffic cun ils scolarets

DAD ANDREAS CADONAU/FMR

■ **La polizia chantunala ha accompagnà trais scolarets da la scola da Favugn ier avantmezdi sur via vi. Impresziuns da las stentas da prevegnir ad accidents sin via da scola èn vegnidas dal schef da la prevenziun da la polizia chantunala grischuna Cuno Berther e da l'instructor Martin Roffler.** Ils trais scolarets da la scoletta da Favugn, *Alena*, *Sina* e *Tristan* han udi ier a chaschun da l'entschatta da scola la parola bainencunoschenta: «Spetgar, tedlar, guardar ed alura ir». Ina maxima che vala anc adina, sco quai che *Cuno Berther*, instructor da traffic e schef da la preveniun tar la polizia chantunala grischuna, ha explitgà ier avant la scola da Favugn. Il tedlar ha retschavì dapli valur en vista a la traziun electronica che sa derasa adina pli fitg. Berther ha menziunà ils circa 3500 scolarets da las 87 scolinas grischuna sa mess ier sin il viadi da chasa en scolina. Prest la mesadad dad els per l'emprima giada en lur vita. Enfin las vacanzas d'atun vulan ils instructers da traffic da la polizia chantunala avair visità tut las scolinas per intermediar in agir correct sin via ed uschia impedir accidents. L'instrucziun dals scolarets è dentant sulet ina da las finamiras da la prevenziun da la polizia, sco quai che Berther ha declarà. Tant impurtant è da far attent automobilistas ed automobilists sin il cumenzament da la scola. Per augmentar lur atenziun visavi als uffants da scola. Uffants che pon magari reagir spontan ed incalculabel.



Sina, Alena e Tristan spetgan l'auto che passa.

FOTO ANDREAS CADONAU

Dapli preschientscha

«La polizia è pli preschenta al cumenzament da scola en la vischinanza da las scolinas.» Quai è medemamain succedi ier a Favugn nua che la polizia ha controllà la spertadad dad automobilistas ed automobilists. Per prevegnir a reacziuns spontan ed incalculablas ha l'instructor *Martin Roffler* accompagnà Alena, Sina e

Tristan pliras giadas sur il passape. «Guardar sin la roda da l'auto e cumenzar ad ir pir cu la roda stat ari.» Berther da sia vart ha regurdà a l'impurtanza da la colur da la vestgadira per augmentar la visibladad. In automobilist remartgà ina persuna vestgida stgir sin 25 meters, vestgadira clera augmenta la vista sin 70 meters e vestgadira che reflectescha ren-

da atenziun gia sin 140 meters. «Perquai retschaivan ils uffants da l'emprima scolina ina tschinta che reflectescha da la polizia da cuminanza cun il TCS.»

Fidanza dals geniturs

La prevenziun e la lavur cun ils scolarets han era l'incumbensa da procurar per fidanza tar il geniturs. Fidanza da laschar ir ils uffants persuls e cun lur cumpogns a scola. «Nus na vulain betg ch'ils geniturs charreschan sezs lur uffants avant scola. Tals scenaris procuran per caos da traffic avant la scola ed augmentan pir da dretg il privel dad accidents.» E betg dad emblidar, grazia a l'instrucziun da la polizia controlleschan il uffants lur geniturs e rendan attent ad in agir correct sin via. Berther è conscient che la situaziun da traffic avant la scola da Favugn n'è betg paregliabla cun tuttas vischnancas en il Grischun. Bleras vias tras ils vitges na posedan betg strivlas melnas e per part era naging passape. Entaifer zonas da trenta mancan per part las strivlas. «L'instrucziun dal traffic sto esser adattada al lieu ed al viadi a scola.» Ed a l'egliada da l'uffant, la saiv viva en la vischinanza da la scola da Favugn lubescha a persunas creschidas da vesair il traffic, als uffants pitschens dentant betg. «Prevenziun vul era dir cussegljar scolinas e vischnancas dad eventualmain adattar l'ambient da la scola ed il viadi dad ir a scola.» Cun la finamira da sbassar il dumber dad accidents, dals 950 accidents sin via cun uffants èn 30 succedids l'onn passà en il Grischun cun set uffants grevblessads.